

SE O VOLÊS LA PÂS RISPIETAITNUS ANCJE NÔ

“Se vuoi la pace rispetta le minoranze” (Zuan Pauli II)

Dopo une lungje strade fate insieme, in fraternitât, preant, sudant e cualchi volte fasint sudâ ancje cualchidun altri, ma simpri però cirint di confrontâsi cu la Peraule di Diu, dulà che o volìn zuiâ la nestre vite;

dopo des zornadis passadis a Riu vert, in fonde riflession su la tematiche des minorancis, che nus tocje in prime rie nò, credents de Glesie Furlane, cu lis nestris comunitâts ladinis, slovenis e todescjîs, o vin gust di meti in rie chei propositis ideâi e operatîfs che nus cjatin aromai adacuardi; no par imponiju a di nissun, ma:

- a) prin di dut come un dipuesit sant dulà che o sin rivâts a cjatâsi in armonie;
- b) e po - se cualchidun al volarà dâ credit a la nestre buine volontât - par spraverî a dute la nestre Glesie Furlane cualchi stiçade pe riflession e par messedâsi in merit.

1. CUISTION ETNICHE: E JENTRE LA FEDE

Resonant a nivel di credents, si viodìn dispès distrigade la cuistion etniche cu l'afermazion che chi no centre la fede, ma dome la pulitiche.

Nô o crodìn che chi o sin denant dal "berdei specific" de nestre Glesie Locâl - fate, pe pluralitât, di minorancis! - berdei che no frontât cun netisie e cun coragjo, al turgulîs ducj chei altris rapuarts e al reste a uso magle di fonde, che e impedîs la credibilitât di dut il rest: massime la pretese che une glesie e à di lavorâ in non di Crist, che al vè un rispîet infinît par ogni diviersitât.

2. ACETÂ I FORESCJ CENCE COPÂ CHEI DI CJASE

Come cristians, nô si rindìn cont a clâr ch'o vin un dovê di fonde di viergi la parte a ducj chei che a vegnin parmîs. Nus tocje però di marcâ la scoretece che si comet acenti, cuant che si dismentee di proposit che la ospitalitât e clame la presince di une part ch'e ospite e une part ch'e ven ospitade. Al é dome par sens di onestât, duncje, ch'o domandìn che ancje ca di nô si clami par non la comunitât ospitant e si ricognossi ancje il so dirit a la vite.

Invezit o viodìn che:

a) Te conflitualitât jenfri origjinariis e vignadiçs, la glesie e à sielzût la soluzion di fâ tasê la comunitât origjinarie; ch'al è come dî: no à sielzût par nuie, o ben, e à frontade la cuistion par ledrôs;

b) par breviâ il maljessi di cui ch'al ven, e à svinidrît vie ogni segn distintîf des comunitâts locâls, creant sul sît un vueil grîs, cence colôrs ni vite.

In cheste maniere: no à onorât l'origjinari, (che si cjate crot e scuintiât) ma nancje il vignadiç, ch'al rive tant che tun desert, cence un tiermin di confront e un stimol a cjessi un positîf rapuart dialetic.

3. COPÂ DUT PAR SINTÎSI DUCJ COMPAGNS NO JE UNE SOLUZION

Une volte, cui ch'al leve pal mont a vore, al scugnive pierdi la sô identitât culturâl parcè che al vignive supât sù de maiorance dal puest; ca di nô, cumó, la maiorance dal puest e pieri la sô identitât culturâl in non dal anonimât di cui ch'al rive. S'ò cjalin a font, si nacuargin ch'o sin denant di dôs formis di inciviltât, prepotence e ancje razisin, di segn contrari, cu la preference che alman-cul une volte une des dôs parts si salvave. O savìn che la cuistion e je intrigade, ma, invezit di scjampâ e lassâ che dut si pierdi, o crodìn ch'e sedi une strade - e che si vedi di frontâle - par salvâ alman-cul chel pôc ch'al è dulà che ancjemò si cjate.

4. O SIN UN GROF CH'AL SCOMBAT PAL VANZELI

Come grop nô o vin la clare percezion che i ambients direzionâi de nestre glesie no puedin glotinus: par cemût che a tratin i predis che si impegnin te cuistion etniche, come ancje pe demonizazion che nus riservin cul metinus in cont tancj mâi diocesans (che a nassin, invezit dai problemis no frontâts!).

Al è di doprâ, no te forme, ma tal struc, il comandament de Carità di Crist; cui che al critiche, nol à di fâlu altri cun asse e prevenzion, ma dome dopo di vê frontade la problematiche a nivel di studi e di passion.

Par cont nestri, stant a ce che il Vanzeli e dute la Sante Scritture a insegnin, a pâr cuntun sglavin di documents gleseâi (e cu la Declarazion dai Dirits dal om), nô si ritignìn Grop di Glesie ch'al lavore pal Ream di Diu e che, par chest, al patìs a cause dal just (Mt 5,9).

5. VONDE TABAIÂ DAL FRIÛL PAR TALIAN

E je ore di finîle di cjararâ di problemis furlans par talian. La lenghe al è il fat plui emblematic che un popul al à; pa la cuâl il predi che no lu dopre, l'operadôr culturâl che no lu onore, il gjenitôr che no lu tramande ai fîs, a àn za fate la siele che chest popul, come tâl, al vedi di sparî.

6. L'AUTORITÂT E JE SOT LA LEÇ DI NATURE

O tignìn par scontât che cualunche autoritât, glesiastiche o civîl, no pues inibî cuntune leç positive i dirits che nus vegnin par leç di nature, cence colâ tun pecjât di presunzion e di rogance denant di Diu e dai umign.

7. LA GLESIE E JE PAI POPUI NO PAI STÂTS

O crodìn che il timp e lis energjiis che la Glesie e met tal incodâsi a la pulitiche stataliste taliane, a son tims e fuarcis strassadis, stant che:

- a) in cheste maniere si pascjele saldo in compromès che a ciulin, a confront cul Vanzeli;
- b) l'ete dai stâts nazionalistics e je tramontade e cumó e sarès ben ore di lavorâ par une Europe dai Popui, là che dutis lis diversitâts a vedin dirit di citadin.

8. LITURGIJE: RISPIETÂ IL SENS DI FEDE E NO LA PREPOTENCE

Chei che tra di nô a lavorin te pastorâl a van a sbati cuintri doi tipos di reazion che la int e à in merit a la introduzion dal furlan te Liturgjie:

- a) cui ch'al approve lu fâs cence scjas, cun agrât, come quant che si gjolt di une visite di Diu;
- b) cui che si mostre contrari, lu fâs in tono insurît, a voltis cun vere prepotence, cun motivazions che a van de retoriche nazionaliste, a la insoference pe diversitât, a la insensibilitât pai problemis di chei altris, a la false carità, a la rude ignorance culturâl.

Nô no sin rivâts a cjarâ cualchidun che nus convincès, cun resonaments evangjelic e rispjetôs, de tristerie de nestre siele.

Pa la cuâl ur disìn a di chei che nus incolpin di lâ cuintri des critichis de int, di scrutinâ a font il struc e l'animus dai arguments, e di no trascurâ plui chei tancj ch'a aprovin tal cûr cence fâ scjas.

9. LA CUISTION DES MINORANCIS: UN SEGN DAI TIMPS

La cuistion des minorancis tal sô vuluç berdeât e je stade studiade a font, di umign di sience, cul-ture, impegn pulitic e religjôs, massime tes ultimis desenis di agns; di chescj

studis a risultin clârs i disastros di personalitât che a son peâts cu l'alienazion etniche di un popul ch'al piert la sô identitât, fint a rivâ a la disafezion pe vite - come che tant si lamentisi in Friûl! -.

Cun dut chest o constatìn une grande mancjance di informazion in mert, ancje da part di vescui, pre-dis e umign che a àn puesej decisionâi te Glesie: ignorance e insensibilitât par un "segn dai timps", che a cjoncin sul nassi ogni onest confront.

Par chest o voessin che ducj i umign di buine volontât a fasessin un sfuarç par capî la problematichis te sô dramatiche urgence e te sô pengece umane e cristiane.

Cualchidun al distrighe il berdei de nestre culture ch'e mûr, afermant che impegnâsi o no in mert, e je "cuistion di ideis".

Ma nol è onest che si fasin passâ par ideis un disimpegn ch'al nas, se mai, de mancjance di ideis.

10. NÔ NO SIN UN PROBLEME: O SIN UN POPUL

Ogni volte che nô furlans o cirìn di clamâ un nestri dirit, il probleme al ven spostât a sec sui pericui che a nassaressin se si è consequents fin dapît.

Par passâ sore di cheste logjiche strambe, tocje visâsi che:

- a) nô furlans, come ducj chei altris popui dal globo no sin, nant di dut, "un pericol", ma o sin dome, come che Diu nus à fats: "furlans". Ogni considerazion a vignê e à sens dome dopo metude in clâr cheste premesse;
- b) ce che o fasìn, po, par vivi in armonie cul nestri jessi al è, nant di dut, un at di fede e di ubidience a Chel che nus à volûts ancje nô!

Che Diu nus judi a cjatâ une strade, prin che dut si risolvi tune omologazion cence anime; par che no continuedin a slontanâsi tra di nô tirantsi maludizions un cul altri, in pen des benedizions che Gjesù Crist nus à raccomandât (viot Lc 8,28); une strade par che ancje nô furlans o tornedin a crodi un sclip di plui te glesie-struture, che fin cumò no le vîn sintude fregul dongje ta chestis cuistions di fonde, lâ che si zue, come çoc, la nestre esistence.

Riu Vert 1989

ADESION

al document metût jù in ocasion de cunvigne di Riu Vert "SE TU VUELIS LA PÂS, RISPIETE LIS MINORANCIS"

a àn firmât in 129